

DOF: 31/10/2016

TENONOTSALISTLI in ik moixpehpenas yei Consejeros Propietarios huan yei Consejeros Suplentes tlen kiixpantian in Organizaciones de la Sociedad Civil, ihkon motekpanas in Consejo Técnico Consultivo itechpa Comisión de Fomento de las Actividades de las Organizaciones de la Sociedad Civil.

ITLAKOTON TENAWATILI

Nochi tenawatili nikan moahsi http://www.dof.gob.mx/nota_detalle.php?codigo=5458889&fecha=31/10/2016

In Comisión de Fomento de las Actividades de las Organizaciones de la Sociedad Civil (in Nechikoli), in yuh tlanawatia in tlaxelolmeh 26, 27, itlaxelolkoneu II ipan Ley Federal de Fomento a las Actividades Realizadas por Organizaciones de la Sociedad Civil (in Tlanawatili), 38, 39 wan 40 ipan itlanawatil wan 5, itlaxelolkoneu VI, ipan Reglamento Interno de la Comisión; kinnotsan in Organizaciones de la Sociedad Civil (OSC) tlen ye omotokaytlali ipan Registro Federal de las Organizaciones de la Sociedad Civil (in Tetokaytlalistli), ik kiixnextiske sekintin iminteixpantihkawan in OSC ihkon monechikos in Nechikoli, ika inin tlanawatilmeh tlen nikan moahsi:

1. Itekiuh in Nechikoli

Xixiuhtika monechikos iwan Nechikoli ik iminsepan tlayehyekoske itechpa imintekiuh wan imintlachiwalis itechpa tlachayawalistli iminaxka in sekin nechikolmeh wan olochtin itechpa Administración Pública Federal.

Kiyekitas itekiuh in Estado mexicano ika tlen moxayawas in tlachiwalistli tlen kihtowa ipan tlaxeloli 5 ipan Tlanawatili, noihi kiikhuiilos sekin tlahtoltin wan tlanonotsalistli itechpa kenin tektilos wan mochiwas;

Kichayawas imitekiuh in altepewah wan nechikolmeh ipan tlasentokilistli, tlachiwalistli wan tlayehyekolistli itechpa itekiuh in Estado mexicano in kenin tlanawatia in achto tlaxeloli;

Kinsentlalis in nechikolmeh wan olochtin itechpa tekiyotl tlen itech moneki ihkon kualit tetlayekoltiske;

Kinyolewaske kenin tlayakanaske wan kenin tekitiske ihkon moahxiltis imintlanekilis wan iminneiskaltilis itechpa imintekiuh;

Kitemos kenin kichiwas ik moahxiltis in Tlanawatili;

Kitenewas itlahtol itechpa kenin wel kintlahtlakoltiske akinke amo kiahxiltiske se itlaxelol noso se itlaxelolkoneuh in Tlanawatili, wan

Kichiwas in Manual de Operación ika tlen tlanawatis itechpa inechikolis wan itekiuh.

2. In kenin oksepa kinixpehpenaske in Consejeros

In kenin tlanawatia in tlaxelolmeh 27, itlaxelolkoneuh II ipan Tlanawatili, wan 38 ipan itlanawatil, in kenin monechikos in Nechikoli pan xiwitl 2016 mixpehpenaske yei itekitihkawan nechikoli wan yei itlapalewiwkawan tlen kiixpantiske in nechikolmeh, tlen mowehkawas ipan yei xiwitl.

3. In kenin kiseliske imintlatitlanilis

3.1 In nechikolmeh tlen omotokaytlalihke ipan Tetokaytlalistli ika estatus de activas tlen imintlaixpantilis ok kualit in yuh kihtowa totlanawatil niman wel kihtoske itechkopa se tlahkuilolamatl akinke imintlakawan tlen mochiwaske imintlaixpantihkawan iixpan Nechikoli. Inon tlakah moneki kiahxiltiske ika tlanawatili in kenin kihtowa tlaxeloli 39 ipan Reglamento de la Ley, tlen tlanawatia:

I. Se tlakatl tlen Mexihko itlalnantsin, tlen melawak kipia imelauhkayo itechpa toaltepewayo wan totlanawatihkayo;

II. Moneki se tlaman kiixnextis ika ye kipixtok makuili xiwitl ipan se tekitl in tlen yehwatl itech powi noso tlayakana ipan nechikolmeh;

III. Amo ok otokaytlalilok in yuh icandidato se políticonechikoli tlen tekitis ipan altepetlayekoltistli ipan yei xiwitl achto inin tenonotsalistli;

IV. Amo tekitihtok nion tekitiya ipan se itlayakanalis se políticonechikoli nion se teoyotika oloch ipan makuili xiwitl achto inin tenoniotsalistli, wan

V. Amo tekitiya ipan se altepetlayekoltistli nion tekitiya in yuh itekitihkawan totlanawatihkayo ipan san tlen inechikol noso itlaman totlanawatihkayo ipan se xiwitl achto ihkuak monextis in yuh ixpehpenalo iixpan Nechikoli.

3.2 Itechpa amatl tlen moneki:

3.2.1 In tlahtlanilistli itechpa akin itech powis in Nechikoli moneki kiplas inin tlamam amatl:

I. Kenin melawak itoka inon tlakatl tlen ixpehpenalos;

II. Kanin mochantia, tlen itlapowal itepostenonotsaloni wan icorreo electrónico in tlaa kipia, wan

III. Se amatl in kanin kihtos tleika kiixnawatian mah ixpehpenalo inon tlakatl, yeseh mah mopowa kenin xiwitl ye tekiti, tlen tekittl kichiwa, kenin itech powi wan kenin kiixnextia inechikol.

Ika nochi inon amatl noihki moneki monechikos okse tlahkuilolamatl, ika itokaymachiyo in candidato, tlen kiselis in Nechikoli, tlen kipia nochi tenawatili wan nochi amatl, wan ika melawak kihtos ika amo tlakahkayawa, yeseh ika melawak kiahxiltihok ika nochi tlen tlanawatilo wan tlahtlanilo ipan tlaixeloli 39 ipan itlanawatil Ley Federal de Fomento a las Actividades Realizadas por las Organizaciones de la Sociedad Civil.

Iwan tlahtlanilistli moneki monechikos se itlaixkopinal inin okse amatl:

I. Currículum vítae in kanin moyekmatis inemilis, itlamachtilis wan itekiuh tlen ye okichiuh (moneki monechikos se itlaixkopinal inon amatl tlen kiyekihtos ika melawak okichiuh inon tlen kihtowa);

II. Iamauh ika tlen axkan momatis akin yehwatl (credencial ika tlen tlamachiyotia, cédula profesional noso pasaporte), wan

III. Amatl ika tlen momatis kanin mochantia (iamauh tlawili noso tepostenonotsaloni)

Nochi inon amatl tlen nikan motlahtlania moneki kimakaske ika amatl wan ika medio magnético itechkopa se disko (CD) noso memoria USB. In tlaa akah amo kiahxiltis inin tlahtlanilistli noso amo wel moyekmatis inon tlatitlanili, niman amo mopowas.

4. Itechpa keman wan kanin kititlaniske nochi tlamam amatl

Ihkuak ye okis inin Tenonotsalistli wan omochayauh ipan Diario Oficial de la Federación (DOF), noihki wel kiahsiske ipan sekin iminamaixko electronico in Gobierno Federal www.gob.mx, noihki moahsis ipan Internet www.corresponsabilidad.gob.mx.

Itechpa keman kiseliske nochi inon amatl noso keman kititlaniske itechkopa correo postal noso mensajería onkas sempowali tonalmeh, tlen pewas mostla ihkuak momextis inin Tenonotsalistli ipan DOF. Nochi amameh noso tlatitlanilmeh san kiseliske ipan Secretaría Técnica de la Comisión tlen moahsi ipan ioficinas Indesol tlen ikal moahsi ipan Segunda Cerrada de Belisario Domínguez número 40, Colonia Del Carmen, Delegación Coyoacán, C.P. 04100, Mexihko Hueyaltepetl, ipan tonalmeh tlen tekitiwa ipan 9:00 ixkichka 15:00 wan ipan 16:00 ixkichka 18:00 iman kawitl. Yehika, san kiseliske inon amatl tlen imachiyo (matasellos) omotlali ipan inon tonali wan iman kawitl tlen ye otlanawatilo.

5. In kenin tlaixpehpenaske

Ihkuak ye otla inon kawitl ten otlanawatilo niman mochiwas imintekpanalis inon tlakah tlen ixpehpenaloske, achto sehsemeh kintlahtlaniske itechpa imintekiuh, ihkon in Nechikoli kiyekmatis kox melawak inon tenawatilmeh tlen kimakahke itechpa inon tlakah tlen ixpehpenaloske.

Satapa, in Nechikoli moneki yankuikpa mosentlalis ik kinixpehpenas inon consejeros, inon tlaixpehpenalistli mochiwas itechkopa imintlamachiyotilis itekitihkawan in Nechikoli tlen ipan yetoske. Inon yankuikpa nesentlalistli mochiwas ipan se kawitl tlen amo kipanawis sempowali wan mahtlaktli tonalmeh satapa ihkuak ye omotsakuak inin Tenonotsalistli.

6. Itechpa kox kisentokaske imintekiuh ipan Nechikoli

Itechpa kox kisentokaske imintekiuh imintekitihkawan wan imintlapalewihkawan in OSC, mah amo kipanawi yei xiwitl. In tlaa mokawaske ok ipan imintekiuh niman pewa mopowas inon tonali ihkuak tlahtoltika kiseliske imintekiuh. Imintekiuh itekitihkawan in nechikoli san mawistilistika yes wan yehika amo kintlaxtlawaske, amo kinmakaske tomin nion okse tlamam netetlayokoli.

7. Itechpa akin tlatlanis

In akin tlatlanis momatis itechkopa amaixko web: www.gob.mx y www.corresponsabilidad.gob.mx, ipan se kawitl tlen amo kipanawis kaxtoli tonalmeh satapa ihkuak ye omochiuh in teixpehpenalistli wan in Nechikoli itechkopa tlahkuilolamatl kinnawatis inon akinke oixpehpalohke.

